

## §. XII

## LAPIDANDVS A TESTIBVS LAPIDABATUR

Quantum momenti in TESTIBVS, eorumque assertis positum fuerit, quantaque ualuerint apud Iudaeos auctoritate, ante demonstratum est. Verum grauissima illis, qui *testimonium* de REO tulerant, iniuncta erat necessitas *initium* LAPIDATIONIS *faciendi*; idque non solum sacrarum literarum auctoritate confirmatur, sed etiam a DEO sapientissime institutum est. Partim enim DEVS hoc praecepto conscientiae TESTIVM iniicere uoluit, ut humanitatis suae memores, a falso sibi temperarent *testimonio*, quod si id fecerint, sibi ipsis uim inferre, et contra dictamen conscientiae, illum, quem sine culpa REVM fecerant, suis manibus reclamante conscientia, trucidare cogerentur. Deut. XIII, 9, et cap. XVII, 7. Partim uero DEVS eo praecepto TESTES a perfidia auocare studuit, quia eo consilio LAPIDATIONI interesse debebant, ut si innocentia ACCVSATI, uel in loco supplicii manifestaretur statim TESTES PERIVRI eodem supplicio affici possent. Deut. XIX cap. a uersu 17. usque ad 20. Ad hunc igitur morem TESTIVM, *primum lapidem* in REVM *proiicientium*, uerba CHRISTI respiciunt: a) *ὁ ἀναμαρτητος ὑμῶν πρῶτος τον λιθον ἐπ' αὐτη βαλετω.* Indequae apparet, Sapientes Iudaeorum, recte affirmare TESTEM oportere *primum lapidem* in REVM *proiicere*, sententia enim *codicis* SANHEDRIN haec est: b) *בית הסקילה היה גבוה שתים קומות אחר מן העדים דוחפו על מתנו נהפך על לבו הופכו אל מתנו אם מת בה*

L 2

a) IOHANNIS cap. VIII. uersu 7.

b) Capite VI. §. 4. fol. 187. col. 2. confer. MOSES MIKKOZI in HILCHOTH SANHEDRIN fol. 188. col. 2. et RABBI MOSES BEN MAIMON in eodem tractatu cap. XV. fol. 738. columna I.